

**REGIONAL NEWS BULLETIN**

**HEADLINES (MORNING)**

1. Chief Minister Pu Lalduhoma’n an sorkar hnuaiah ‘Work Order’ tel lova hna inpek pakhat mah a awm tur a ni lo, a ti
2. Health Minister Pi Lalrinpuii’n Mizoramah ramhmul damdawi a tam theih nan State Medicinal Plants Board-in hma a la nasa, a ti
3. Maharastra Assembly inthlan leh Jharkhand Assembly inthlan thawh hnihna atana nominatin thehluk hun chu nimin khan tawp a, vawiinah nomination endik a ni ang.
4. Prime Minister Narendra Modia chuan hriselna lama hmasawna ruhrel tihchangtlun chu sawrkarin a ngaipawimawh a ni a ti

<><><>

**CM - MIZORAM ECONOMICS SUMMIT**

Chief Minister Pu Lalduhoma’n an sorkar hnuaiah ‘Work Order’ tel lova hna inpek pakhat mah a awm tur a ni lo, a ti.

Nimina MZU Dept. of Economics leh Mizoram Economics Assn. te’n an buatsaih, Mizoram Economics Summit, Aijal Club-a a hmanpuinaah sorkar sum leh pai tibuai thei thil hrang hrang sawiin Chief Minister chuan, ‘Work Order’ tel lova hna inpek tam lutuk chuan sorkar sum leh pai dinhmun a tibuai thin tih a sawi a. Tunah hian ‘work order tel lova hna inpek a tam hle a, chumiin a ken tel sum pawh a tam hle, a ti a. Lengpui Airport-a hna inpek ang chi, work order pawh awm lo, sorkar record-ah pawh awm lo, administrative approval pawh lak hleih loh, expenditure sanction pawh pek ni lo, tawngkaa hna inpeka thawh tawp mai, hna an thawh zawha Bill pek loh theih loh bawk si ang chi te chuan sorkar sum dinhmun dik tak a hriattir hleithei lo a ni, a ti.

**(CM Byte)**

A dawngtu turte hnena a hun dik taka sum pek loh avanga a pung, ‘penalty interest’ pek pawh a tam hle, Chief Minister chuan a ti a. Hetiang hremna vanga a pung pek ngai hi Nuai Sang chuang a awm a, hei hi sorkar chuan a rul ngat ngat a ni, a ti a. Contractor-te nena sorkarin inremna a ziah thin dan pawh a fuh tawh lo tih sawiin inremna ziah a nihin sorkar chan a chau sa em em a, contractor lam chan a vawng sa nghal em em ringawt thin a, contractor a hlawk chuan a man tang ei an awm ve dawn tih a rin nghal theih a ni, a ti a. Tun hnuah chuan inremna siam a nih reng rengin sorkar chan a tha thei ang bera siam tawh tur tih chu an thupui a ni, a ti.

Procurement Rules, 2020 chu siam that a ngaih thu pawh sawiin Chief Minister chuan a man tlawma sorkarin thil lei tur a hmuh te pawh Procurement Rules hian a phalsak tlat loh avangin he dan hi siam tha turin an ngaihtuah mek a ni, a ti.

(Desk)

<><><>

**RAJ BHAVAN**

Mizoram Larsap chenna Raj Bhavan chu Diwali pualin waviin leh naktukah mipui tlawh theiha hawn a ni dawn.

Raj Bhavan hi tlai dar 4 atanga zan dar 7 thleng mipui tan hawn a ni ang a, Hmarlam Gate, Main Gate atanga luh leh chhuah tur a ni.

(DIPR)

<><><>

**DRAFT ROLL, 2025 PUBLISHED**

Mizoram chhunga Assembly Constituency 40 atana Draft Electoral Roll, 2025 chu nimin khan tarchhuah a ni a, chumia a lan dan chuan Mizoram pumah vote nei mi Nuai 8 Sing 5 Sang 8 leh 534 an awm a. Heng zinga Nuai 4 Sing 1 Sang 5 leh 867 te chu mipa an ni a, Nuai 4 Sing 4 Sang 2 leh 667 te chu hmeichhia an ni. Mipa aia hmeichhia an tam zawkna hi Sing 2 Sang 6 leh 800 a ni. Mizoram pumah Service Voter Mipa 4,259 leh hmeichhia 91, an vavin mi 4,350 an awm mek bawk.

Draft Electoral Roll en duh chuan mahni bialtu ERO/AERO/BLO te hnenah emaw, DC/DEO Office-ah emaw, CEO website - <https://ceo.mizoram.gov.in/-ah> emaw en theih a ni.

India khua leh tui diktak, ECI in qualifying date atana a puan ni 01.01.2025, 01.04.2025, 01.07.2025 leh 01.10.2025 engemaw bera kum 18 tling hman tur te chuan thla thar November ni 28 thleng mahni bialtu

ERO/AERO/BLO te hnenah Electoral Roll-a inthun luh dilna thehluh theih a ni a. Dilna hi <https://voters.eci.gov.in> leh Voter Helpline App atang tein thehluh theih a ni bawk.

Tunah hian Mizoram pumah Polling station 1301 a awm mek a ni.

(CORR)



## 9TH NATIONAL AYURVEDA DAY

Larsap Dr. Hari Babu Kambhampati-a'n Mizoram chu ramhmul damdawia hausa tak a nih thu sawiin hei hi hman tangkai a nih chuan Mizoramah damdawi thiamna hmanga tihdam hnathawh nasa takin a tichak thei, a ti.

National Ayurveda Day Vawi 9-na puala Assembly Annexe, Aizawla inkhawm buatsaih nimina a hmanpuinaah he thu hi sawiin Larsap chuan, Ayurveda chu khawvel huapin miten inenkawl nan a tha tih pawmin an hmang uar hle, a ti a. Tihdam hna thawh nan dan ang taka kalpui ram 24 an awm tih sawiin khawvela damdawi lam siamna hmun lian hrang hrangin Ayurveda chu natna hrang hrang enkawl nan a tha tih an hmuchhuah mek tih a sawi a ni.

Larsap chuan Ayurveda damdawi hrang hrang chu ram 100 chuangah thawnchhuah tawh a ni, a ti a. WHO leh Ministry of Ayush chu an thawk dun tha hle tih sawiin he thawhhona rahchhuah hmang hian Ayurveda kaihhnawih inzirtirna leh hnathawh hrang hrang pawh huaihawt thin a ni, a ti a. Mizoramah pawh Ayurveda chu mipuite hriselna kawnga pawimawh tak a nih zel theih nan chawinung zel turin kalkhawmte a sawm a ni.

He huna khualzahawm Health Minister Pi Lalrinpui pawhin Ayurveda chu hmanlai thiamna mai ni lo, tunlaia damdawi lama harsatna sukiantu pawimawh tak a la ni zel a ni, a ti a. Mizoramah ramhmul damdawi a tam theih nan State Medicinal Plants Board-in hma a la nasa a ni, a ti a. Sorkar scheme kalpui mek Bana Kaih-ah pawh ramhmul damdawi lam dah tel turin hma lak mek a ni tih sawiin Mizoram Healthcare system-ah AYUSH chu sorkar damdawi in hrang hrang bakah AYUSH Health & Wellness Centre 41 bakah Integrated AYUSH Hospital, Thenzawlah te kalpui mek a ni, a ti a. Hei bakah hian helama zirbingna kalpui zel a ni tih a sawi bawk.

**(Health Min. Byte)**

National Ayurveda Day puala hun hmanah hian Larsap chuan Article inziahsiaka tithate hnenah lawmman a hlan a ni.



## CHAMPHAI - LITERARY FESRTIVAL

Art & Culture Department leh Mizo Academy of Letters (MAL) tangkawpin an buatsaih 'Thu leh Hla Kutpui' chu nimin khan Govt. Champhai College Multipurpose Hall-ah hman a ni a; Art & Culture Minister Pu C. Lalsawivunga'n a hmanpui.

Minister chuan Mizo Historian hmasa ten thahnemngai takin bul lo tan tawh mah se sawrkar angin 'hei hi a dik chu a ni e', tia pawm a la awm lova, mi tinin an pawm tlan theih tur History neih theih nan sorkar chuan hma a la a ni, a ti.

Thu leh Hla Kutpuiah hian 'Zofate thlang tlak dan zir chianna' tih chu thupuiah hman a ni a; "Zofate thlang tlak dan – Lungphun hmanga zirchianna" tih leh "Zofate thlang tlak chhan leh an thlang tlakna kawng' tih thupui te zirhova sawiho a ni.

(Lalhluipua PTC Champhai)



## KOLASIB –BANK LOAN TO 32 SHGs

Mizoam State Rural Livelihoods Mission (MzSRLM), Bilkhawthlir Block leh Mizoram Rural Bank (MRB) tang dun chuan nimin khan Bilkhawthlir RD Block huam chhunga Self Help Group (SHG) hrang hrang 32 te hnenah Bank loan Cheng Nuai 126 leh Sing 5 an pe chhuak.

MRB Vairengte Branch-in SHG pahnih hnenah Loan pein MRB Kolasib Branch-in SHG panga; MRB Hmar veng Branch-in SHG pathum; MRB Bilkhawthlir Branch-in SHG sawmhnih pahnih te hnenah loan an pe chhuak a ni.

(Andrew VL Auva PTC Kolasib)



## LUNGLEI ANTI-TOBACO SQUAD MEETING

Nimin khan Lunglei DC Conference Hall-ah Addl DC Pu James Miahlung kaihhruiin Lunglei District Anti-Tobacco Squad an thukhawm a. Zuk leh hmuama thalaite an fihlim theih nana beihpui thlak, "Tobacco Free Youth Campaign 2.0" (TFYC 2.0) kalpui meka Lunglei District chhunga hma lak dan thlirhovin, hma lak zui zel dan tur an sawiho.

Hemi puala Lunglei District chhunga zirna inte zuk leh hmuama fihlim, tobacco free educational institution (ToFEI)-a puan an nih theih nana hmalakna kalpui mekah primary school leh middle school 427 chu ToFEI-ah puan fel tawh an ni a. High school leh Higher Secondary school 124 zinga 65 chu ToFEI-ah puan an ni tawh bawk a, zirna in 59 hmabak a la awm tih tarlan a ni.



## SERCHHIP – YMA DRUGS AWARENESS

Adult Rehabilitation Centre Chhiahtlanga awmte chu nimin khan ruihhlo chungchangah zirtirna pek an ni.

The Salvation Army ten ruihhlo ngai an enkawlana, Adult Rehabilitation Centre-a awm mek mi 19-te hnenah hian ruihhlo sima nunkawng dik an zawh theih dan tur kawhhmuhna hun hman a ni a. He hunah hian Serchhip Sub-Hqrs. YMA President Pu Kawlthuama chuan kum khat chhungin Serchhip khawpuiah ah mitthi 141 an awm tawh a, heng zingah hian thalai kum 50 hnuai lam 61 an awm a; hei hian theihtawpa ruihhlo do a tul zia a tilang a ni, a ti.

Ruihhlo chungchanga zirtrina petu Serchhip Sub-Hqrs. YMA Training & Youth Affairs Committee (TYAC) hian school pathumah hetiang hian thupui hrang hrang - Zo nun ze mawi inzirna, eizawna tur inkawhhmuhna leh Mobile phone hman khawloh laka fimkhur tul thu te zirtirna an lo pe tawh a ni.



## AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theiha dah a ni



## ELECTIONS

Maharastra Assembly inthlan leh Jharkhand Assembly inthlan thawh hnihna atana nominatin thehluk hun chu nimin khan tawp. Vawinah nomination te hi endik a ni ang. Maharastra ah hian assembly bial 288 awmin Jharkhand inthlan thawh hnihnaah hian Assembly bial 28 a awm a. Thlaleh ni 20 ah vote thlak a ni ang. Thlaleh ni 4 thleng inhnuhdawh theih a ni ang.



## PM

Prime Minister Narendra Modia chuan hriselna lama hmasawna ruhrel tihchangtlun chu sawrkarin a ngaipawimawh a ni a ti. Nimina Dhanvantari Jayanti leh Ayurveda Day wawi 9 na New Delhi-a a hmanpuinaah he thu hi sawiin Pu Modia chuan ram hmasawn ruala mipuite an hrisel zel chu an thil tum a ni a ti a. Pu Modia chuan mi retheite beidawna ata khaichhuak turin Ayushman Bharat Yojana sawrkarin a siam a ti a. Hei hian mi retheite damdawiin awmna cheng nuai 5 thleng sawrkarin a tumsak a ni a ti.

Prime Minister Modia hian health sector kaihnhawih hmasawna project cheng vaibelchhe sing khat sang hnih leh 850 hu a hawng baw a. He hunah hian PM Jan Aushadhi Kendra 14,000 rampumah siam tawh thu tarlan a ni baw.



## BUS ACCIDENT

Rajasthan-a Sikar district-a lirthei chesualah mi 12 an thi a, midang 25 in hliam an tuar. Thudawn danin lirthei chesual hi khualzin phur bus Salasar atagna Nawalgarh pana tlan a ni a. Lirthei khalhtu hian thunun zo loin culvert a su a. Inspector General of Police, Satyendra Chaudhary chuan hliam tuar thenkhat chu Jaipur-ah lak an ni a ti.

